



## საქართველოს იუსტიციის უმაღლესი საბჭო

ქ. თბილისი № 1/301

“ 30 ” ოქტომბერი 2017 წ.

### გ ა ლ ა წ ყ ვ ე ტ ი ლ ე ბ ა

**„მოსამართლეობის საკვალიფიკაციო გამოცდის ჩატარების წესისა და საკვალიფიკაციო საგამოცდო პროგრამის დამტკიცების შესახებ“ საქართველოს იუსტიციის უმაღლესი საბჭოს 2007 წლის 25 სექტემბრის №1/207-2007 გადაწყვეტილებაში ცვლილების შეტანის თაობაზე**

1. „მოსამართლეობის საკვალიფიკაციო გამოცდის ჩატარების წესისა და საკვალიფიკაციო საგამოცდო პროგრამის დამტკიცების შესახებ“ საქართველოს იუსტიციის უმაღლესი საბჭოს 2007 წლის 25 სექტემბრის №1/207-2007 გადაწყვეტილებით დამტკიცებულ „მოსამართლეობის საკვალიფიკაციო გამოცდის ჩატარების წესში“ (დანართი 1) შეტანილ იქნეს შემდეგი ცვლილება:

ა) წესის III<sup>1</sup> თავი ამოღებულ იქნეს;

ბ) 28-ე მუხლი ჩამოყალიბდეს შემდეგი რედაქციით:

**„მუხლი 28. საკვალიფიკაციო საგამოცდო კომისიის შექმნა და მისი უფლებამოსილება**

1. საგამოცდო ტესტის (საგამოცდო ბილეთის) საკითხების შედგენის მეთოდოლოგიისა და მისი სირთულის დონის განსაზღვრის, საკითხების ბაზის მართვისა და საგამოცდო ბილეთის ფორმირების, წერითი ნამუშევრის შეფასების კრიტერიუმების განსაზღვრის, საკვალიფიკაციო გამოცდის მონაწილეთა პროფესიული დონის შემოწმებისა და საკვალიფიკაციო გამოცდის შედეგების შეფასების მიზნით იქმნება საკვალიფიკაციო საგამოცდო კომისია (შემდგომში - საგამოცდო კომისია).

2. საგამოცდო კომისია იქმნება საქართველოს იუსტიციის უმაღლესი საბჭოს მიერ 20 წევრის შემადგენლობით, რომელთაგან 6 არის სისხლის სამართლის სპეციალისტი, 6 - სამოქალაქო სამართლის, 4 - ადმინისტრაციული სამართლის, 2 - საკონსტიტუციო სამართლის და 2 საერთაშორისო სამართლის სპეციალისტი. საგამოცდო კომისიას ხელმძღვანელობს თავმჯდომარე, რომელსაც საგამოცდო კომისიის წევრთაგან ნიშნავს საქართველოს იუსტიციის უმაღლესი საბჭო.

3. საგამოცდო კომისიის წევრი შეიძლება იყოს საქართველოს მოქალაქე, რომელსაც აქვს უმაღლესი იურიდიული განათლება არანაკლებ მაგისტრის ან მასთან გათანაბრებული აკადემიური ხარისხით, სპეციალობით მუშაობის არანაკლებ 5 წლის გამოცდილება და მაღალი რეპუტაცია. საქართველოს იუსტიციის უმაღლესი საბჭოს წევრი იმავდროულად არ შეიძლება იყოს საგამოცდო კომისიის წევრი.

4. საგამოცდო კომისიის წევრის საქმიანობა ითვლება სამეცნიერო-პედაგოგიურ საქმიანობად. საგამოცდო კომისიის წევრს უნდა გააჩნდეს კომისიის წევრის ფუნქციების განხორციელებისათვის საკმარისი კვალიფიკაცია, რაც დასტურდება სსიპ - შეფასებისა და გამოცდების ეროვნული ცენტრის მიერ გაცემული სერტიფიკატით.

5. საგამოცდო კომისიის წევრობის კანდიდატის დასახელების უფლება აქვს საქართველოს იუსტიციის უმაღლესი საბჭოს წევრს. საგამოცდო კომისიის წევრის არჩევა ხდება კენჭისყრის საფუძველზე. თუ კენჭისყრის შედეგად ამ გადაწყვეტილებით დადგენილ რაოდენობამდე შესავსებად ხმათა თანაბარი რაოდენობა ასარჩევზე მეტი რაოდენობის კანდიდატმა მიიღო, უპირატესობა მიენიჭება იმ კანდიდატს, რომელიც საქართველოს იუსტიციის უმაღლესი საბჭოს უფრო მეტი წევრის მიერ იყო დასახელებული, აქვს უფრო მაღალი სამეცნიერო ხარისხი ან/და პრაქტიკული მუშაობის უფრო დიდი გამოცდილება.

6. საგამოცდო კომისიის წევრთა უფლებამოსილების ვადაა 3 წელი. გადაწყვეტილებას საგამოცდო კომისიის წევრის უფლებამოსილების შეწყვეტის შესახებ იღებს საქართველოს იუსტიციის უმაღლესი საბჭო. საგამოცდო კომისია საქმიანობას ახორციელებს საორგანიზაციო კომისიის შექმნიდან საკვალიფიკაციო გამოცდის შედეგების დამტკიცებამდე.

7. საგამოცდო კომისიის შემადგენლობა ანონიმურია. საგამოცდო კომისიის წევრს არ აქვს უფლება გაამჟღავნოს საგამოცდო ტესტის (საგამოცდო ბილეთის) შინაარსი. საგამოცდო კომისიის წევრის მიერ ანონიმურობის ვალდებულების დარღვევა შეიძლება გახდეს მისთვის საგამოცდო კომისიის წევრის უფლებამოსილების შეწყვეტის საფუძველი.

8. საგამოცდო კომისიის წევრის საქმიანობა კომისიის საქმიანობის განხორციელების პერიოდში ანაზღაურებადია. საგამოცდო კომისიის წევრთან შრომით ხელშეკრულებას აფორმებს საქართველოს იუსტიციის უმაღლეს საბჭოსთან არსებული სსიპ - საერთო სასამართლოების დეპარტამენტი. შრომითი ხელშეკრულებით განისაზღვრება საგამოცდო კომისიის წევრის შრომის ანაზღაურება.“;

გ) 28-ე მუხლის შემდეგ დაემატოს შემდეგი შინაარსის 28<sup>1</sup>-28<sup>3</sup> მუხლები:

**„მუხლი 28<sup>1</sup>. საგამოცდო კომისიის თავმჯდომარე**

1. საგამოცდო კომისიას ხელმძღვანელობს თავმჯდომარე, რომელიც:

ა) უძღვება საგამოცდო კომისიის სხდომებს;

ბ) ისმენს საორგანიზაციო კომისიის ინფორმაციას უშუალოდ გამოცდების მიმდინარეობის შესახებ;

გ) საგამოცდო კომისიის წევრებს აცნობს საგამოცდო საკითხების (ტესტების) დადგენილ სტანდარტს და მათთან ერთად შეიმუშავებს წერიითი ნამუშევრის შეფასების კრიტერიუმებს;

დ) უშუალოდ მეთვალყურეობს გამოცდების შედეგების შეფასების პროცესს;

ე) საგამოცდო კომისიის მიერ გამოცდების შედეგების დამტკიცების შემდეგ წარუდგენს ინფორმაციას საქართველოს იუსტიციის უმაღლეს საბჭოს;

ვ) საგამოცდო კომისიის შემადგენლობიდან ქმნის საპრეტენზიო კომისიას და ხელმძღვანელობს მის საქმიანობას.

**მუხლი 28<sup>2</sup>. საპრეტენზიო კომისია**

1. საკვალიფიკაციო (ტესტური და წერიითი) გამოცდის შედეგების გადასინჯვის მიზნით იქმნება საპრეტენზიო კომისია.

2. საპრეტენზიო კომისიის შემადგენლობას საგამოცდო კომისიის წევრთაგან განსაზღვრავს საგამოცდო კომისიის თავმჯდომარე.

3. ტესტური და წერიითი გამოცდის შემდეგ მიღებული შეფასებით უკმაყოფილო გამოსაცდელი უფლებამოსილია განცხადებით მიმართოს საპრეტენზიო კომისიას მისი შეფასების გადასინჯვის მოთხოვნით. პრეტენზია მიიღება გამოცდის შედეგების გამოცხადებიდან ორი დღის განმავლობაში სპეციალურად ამისათვის გამოყოფილ ადგილას. დაგვიანებით შემოსული პრეტენზიები არ განიხილება.

4. ტესტური გამოცდის შეფასების გადასინჯვა, როგორც წესი, შესაძლებელია იმ შემთხვევაში, თუ გამოსაცდელმა დააგროვა სულ ცოტა 70 (სამოცდაათი) ქულა.

5. წერიითი გამოცდის შეფასების შეჯამება, როგორც წესი, შესაძლებელია იმ შემთხვევაში, თუ გამოსაცდელმა დააგროვა სულ ცოტა 10 (ათი) ქულა.

6. საპრეტენზიო კომისიის შემადგენლობა ანონიმურია და შედგება 7 წევრისგან.

7. საპრეტენზიო კომისიის მიერ პრეტენზიის განხილვისას დაცულია ორმხრივი ანონიმურობის პრინციპი.

8. ტესტური და წერიტი გამოცდის შედეგებზე პრეტენზიების განხილვისას საპრეტენზიო კომისია საპრეტენზიო განცხადებაზე აკეთებს შეფასებას, რაც დასტურდება კომისიის წევრების მიერ საიდენტიფიკაციო კოდით. საპრეტენზიო განცხადებების გასწორებისა და იდენტიფიკაციის შემდეგ პრეტენზიების განხილვის შედეგები შეიტანება უწყისში და დასტურდება საგამოცდო კომისიის ყველა წევრის ხელმოწერით.

### **მუხლი 28<sup>ა</sup>. საკვალიფიკაციო გამოცდის შედეგები**

1. საკვალიფიკაციო გამოცდის საბოლოო შედეგებს ამტკიცებს საგამოცდო კომისია, რომელიც შემდეგ წარედგინება საქართველოს იუსტიციის უმაღლეს საბჭოს.

2. პირები, რომლებმაც წარმატებით ჩააბარეს საკვალიფიკაციო გამოცდა, იღებენ სერტიფიკატს.

3. საგამოცდო კომისია გამოცდების შედეგებს აქვეყნებს საქართველოს იუსტიციის უმაღლეს საბჭოში.“.

2. საქართველოს იუსტიციის უმაღლესმა საბჭომ საკვალიფიკაციო საგამოცდო კომისიის შექმნის მიზნით უზრუნველყოს წევრობის კანდიდატთა შერჩევა და მათი გადამზადება სსიპ - შეფასებისა და გამოცდების ეროვნული ცენტრის მიერ შემუშავებული ტრენინგ-მოდულების შესაბამისად.

3. ძალადაკარგულად გამოცხადდეს „მოსამართლეობის საკვალიფიკაციო საგამოცდო კომისიის დებულების დამტკიცების შესახებ“ საქართველოს იუსტიციის უმაღლესი საბჭოს 2007 წლის 25 სექტემბრის №1/209-2007 გადაწყვეტილება.

4. ეს გადაწყვეტილება ამოქმედდეს მიღებისთანავე.

გიორგი მიქაუტაძე

საქართველოს იუსტიციის  
უმაღლესი საბჭოს მდივანი



